

四庫全書

集部

欽定四庫全書

集部

松菴集卷一至三

詳校官右中允臣薩敏

主事臣呂雲棟覆勘

謄錄監生臣馮克鞏

謄錄監生臣徐元秀

欽定四庫全書

集部四

提要

崧庵集六卷

別集類三

宋

臣等謹案崧庵集六卷宋李處權撰處權宋史無傳其集諸家亦不著錄惟方回瀛奎律髓內錄所作送二十兄還鎮江詩一首而注其後云處權字巽伯洛陽人邯鄲公淑之後有崧庵集宣和間與陳叔易朱希真以詩名

南渡後嘗領三衢云云其履貫畧可攷證而亦不言其距李淑為幾世今其集傳本已絕獨永樂大典中有之且尋檢各韻處權自序及其從弟處全原序邠驥原跋一一具在所紀生平踪跡差為詳備惟世系仍未明晰今案建康志有李處全小傳稱處全淑之曾孫本豐縣人後遷溧陽官至朝請大夫而王明清揮塵餘話亦稱大理少卿李傳正為淑孫即

處全之父據此則處權實淑曾孫而家於溧陽瀛奎律髓所稱洛陽當是刻本傳訛以溧為洛耳淑家富典籍其邯鄲圖書志晁公武每引以為據又精研聲律所作詩苑類格今尚散見諸書中處權承其世學更能標新領異別出以清雋之思於詩道頗為深造處全序稱其齒益高心益苦句法益老與少作不類是其覃思吟詠老而愈工雖原帙散佚東

京與南渡以後所作互相糅雜不復能以年
歲辨析而綜其大概五言清脫瀏亮畧似張
耒七言爽健伉浪可擬陳與義在當時實一
作手久經湮沒幸而復存亦論宋詩者所宜
甄錄也謹採掇排比以體區別釐為六卷仍
以原序跋分繫前後俾將來有以考見焉乾
隆四十六年六月恭校上

總纂官臣紀昀臣陸錫熊臣孫士毅

原序

少陵句法出審言豫章句法出亞夫有唐若我宋詩人
莫可居二老先蓋其祖考源流所從來遠世父萊陽府君
少承家學尤刻苦於詩建中靖國間送張芸叟帥中
山三十韻有孝治追羊棗嘉言問凍梨之句浮休撫几
嗟賞以為發語渾厚託意微婉可為後學模範自是名
重京洛為郎拜州汨汨舊轍晚節益不偶至於廢放流
離度隴蜀入涪萬逮還故官北歸下瞿塘灩澦泛大江

沂淮汴多厯奇嶮益昌其詩崧庵兄世父仲子也人物
高秀山立玉舉世父愛之早付以衣鉢在政宣時與陳
叔易朱希真皆以詩名中更兵火奔迸遇物托興亦未
嘗一日廢紹興甲子而後齒益高家益貧用心益苦句
法益老始與少作不類然暮年頗艱出故不多見噫詩
果能窮人抑窮而後工耶審如是則詩固人所忌也紹
興己巳余與兄合并於武林者逾月將行飲餞浙江上
臨分哽噎不忍別且道家世斯文之屬後六年兄歿於

荊州蓋不獲再見矣諸子流落湖外遺編斷葉多為喜吟詠者持去心常慊焉陳君安民惠伯調官中都因過余溧陽暇日語長沙佳士有劉氏伯仲廬陵人自其先世喜與賢士大夫遊兄建炎末避地客其家其調護甚至舊所藏詩文頗多或者久假而不歸每恨不獲鋟版與吾人共之因哀輯少日所記與十數年來摭拾得之於親舊間者四百餘篇寄惠伯使歸諸劉氏以滿其好事樂善之意兄嘗自叙作詩本末獨幸偶存較之今所

亡則甚夥而先後亦失次矣異時復有得焉當為別集
處全行年五十而學益落雖嘔出肺肝望古人地位終
不能到一燈弗焰愧負識別慨然雪涕書所欲言不文
其辭也淳熙六年歲在己亥八月望日弟處全謹題

自序

處權未冠始學詩於先君一日謂處權曰三百篇詩之祖也六義存焉至六月序篇卒之以小雅盡廢則四夷交侵中國微矣詩之道豈小補哉小子識之處權再拜服膺而退既冠歸洛則又學詩於鄉先生段處厚約亦一日謂處權曰昌黎公作薦士詩序詩之高下得失至矣盡矣不可以加矣學者當於此求外此非吾所知也處權敬佩書紳于今不忘處權固陋既不敢墜先君之

訓又不敢負段丈之教雖羈旅鞍馬疾病呻吟拳拳之
思終在是也昔人所謂目瞑知深搜吻動覺苦思與夫
鈎章棘句月鍛季鍊者自謂有焉五十年間作古賦五
古詩三百律詩一千二百雜文二百長短句一百平生
之力盡於此矣不自知其不可也異時陽翟陳叔易恬
嘗語孫正夫端曰恬歸自岷峩行六千里復見中州知
舊其氣不衰文益進者季異伯而已汪內相藻彥章程
紫微俱致道皆極力推稱口之不置故一時名流勝士

翕然相與衡守張巨山嶠嘗遺處權書云近朱希真報
異伯寄示夢歸古賦文采不減兩漢字畫遠追晉宋當
今第一流也公有此客顧不佳哉處權繇是稍得自信
而其志益確不知老之已至身世皆寓於其中而未始
語人亦難與世俗道也暇日拾掇次第粗成編綴名之
曰崧庵集後日有能敦義愛半夜走緘書俾作者序而
傳之耶或謂玄尚白用覆瓿耶則不敢知也紹興二
十有四年歲在癸酉二月旦日崧庵惰夫李處權序

欽定四庫全書

松菴集卷一

宋 李處權 撰

賦

樂郊賦

并引

春雨既霽放步於野見飛者鳴者哺於巢者游泳於淵
者戲走於陸者與夫行歌而醉於路者凡生物之遂植
者蓋俯仰之間無不欣欣而樂也於是感焉予亦忘其
老之將至身世之所遭也而況不隕獲於貧賤既行乎

其素矣則何往而不自得邪作樂郊賦其辭曰

感餘生之幾何兮冒霜雪以盈顛邈吾廬之安在兮寄
幽夢于澗渥駛歲月之不留兮梗行路之且遠起臨風
之浩歎兮嗟欲往以無緣徒搔首以延佇兮復顧影而
自憐眷於越之上游兮適寓止之所便稅予駕于蕭寺
兮占南嚮之明軒敞函丈之几席兮納萬頃之風煙屬
幽人之晨興兮暢晞髮而漱泉徐拂塵而啟戶兮藹春
物以相鮮紛宿雲之解駁兮散朝陽於一川挺嘉木以

敷陰兮嚶其鳴而始遷念人生之行樂兮宜及時而勉
旃飫筍蕨于既飽兮破月團而自煎幅巾藜杖適野在
田或狎鷗而藉草或觀魚而臨淵或流憇以騁望或會
心以忘言于時遠山兮連連近水兮濺濺青秧兮芊芊
白露兮娟娟麥初芒兮燕乳桑已葢兮蠶眠喜膏潤之
及私兮庶遂逢於有年田父野老醉著道邊扶攜不去
墮幘頽然蓋不減拾遺之杜曲右丞之輞川也予亦興
盡而返欣此地偏披襟脫帽斷簡絕編樽陶情而有酒

兮琴寓意以無絃惟受性之拙踈兮乏趨時之周旋委
窮達於造物兮問行藏于彼天凜歲寒之孤操兮固久
久而彌堅擬登高之能賦兮託餘思以終篇方俯仰而
自得兮尚無媿於昔賢

夢歸賦

并引

予洛人也既更衰亂奔竄潛伏煙塵阻絕身世相弔遑
遑乎羈旅之憂忽忽乎歲月之久也遲暮良苦一夕夢
歸故里顧經於目而歷于耳者慙不勝乎其悲也作夢

歸賦雖文不足采而援古知今卒反乎正庶不謬述作
之旨云其辭曰

夢故國之圯城兮陟曲隅之歇亭俯伊洛之蜿蜒兮仰
嵩少之崢嶸痛一炬之焦土兮徹雲漢以宵賴弔瓦礫
之塞路兮失厦屋之連甍菑草木之叢灌兮駭鳥獸之
悲鳴訪吾廬之無處兮慨遺址之已平動心目之惋傷
兮慘神沮而骨驚究此都之宏達兮匪郡國之可配也
挺龍門以竝其面兮伏印阜之峙其背也亘飛梁於波

上兮矯雙闕於雲外也鳴天鷄之一聲兮非煙擁乎冠
蓋也思當年之行樂兮信承平之嘉會也
想澗瀍之始卜兮奠九鼎而初定也
宅取夫天地之中兮氣得乎陰陽之正也
奉巍峩以再遷兮轉岌業之連乘也
揭神行而百靈護兮極方怒之萬牛併也
世三十而年七百兮姬公導其慶也
諒輕重之在德兮胡楚子之可問也
皇哉我朝兮邁德事之追前聖也
偉恢復之鴻業兮眷上帝之所命也
陋玄肅而不算兮抗宣光之與並也
席成

基以永固兮膺寶運之方競也觀茲鼎之復出兮奄舊
宅而果盛也

梅花賦

予衰病索居經歲不出芳物過眼真成一夢偶作梅花
小賦以寄所懷其辭曰

伊造物之發生兮無一木之不卉顧四時之不齊兮曜
白黃與丹紫懿江梅之秀出兮儼亭亭而絕比既嬋娟
以暎岫兮復窈窕以臨水類忘言之貞士兮肖獨潔之

君子許蘭茝之僅似兮晚桃李之可鄙占嘉月與好風
兮泛幽香而未已寄美人之一枝兮想橫斜于鏡裏抗
翠袖於天寒兮撫修竹而孤倚悵衰翁之揜闕兮抱微
疴之在體起三嗅而三歎兮魂忽蕩而心欲死

悼亡賦 并引

予幾七十而鰥倡無和也問無應也視人世之苦無甚
于茲者一日抑淚茹悲作悼亡賦雖不足以增伉儷之
重庶使覽者知予不敢于其厚者薄也其辭曰

噫予雖老而鰥兮坐成窟獨之叟眷伊人之具美兮視
同列而未有追維琴瑟之義兮謂相從于白首忽一日
而不見兮慘四顧而無偶始來嬪于我家兮候五十之
改歲惟內政之克修兮躬蘋蘩于時祀施慈惠於僕妾
兮靡失色于娣姒既甘苦而食淡兮實于君而有愧何
沉疴之不解兮豈厄會之偶值楚切切而在牀兮旦日夜
以相繼愀皮骨之僅存兮情惻惻而不忍視訖命盡而
數絕兮奄悠然而長逝痛割裂於心膺兮隕滂沱之涕

洒譬令孽婦之久生兮曷若假夫君以永世信尤物之
易毀兮審竒花之早落抱雌如吳門之劍兮返魂無齊
人之藥顧晨夕之傍徨兮類失侶之孤鶴攬明月之入
牕兮驚風動乎簾幙淡星河之欲曉兮清露零于叢薄
悄空閨之岑寂兮想音容于冥漠矧早衰之多難兮決
非久于世者歎幽明之異路兮復何時而見也哀斷絃
之莫續兮悵貝書之不復把懷平生之好合兮竟繾綣
而難舍覲魂夢之可接兮睇長松于廣野雖涸流以濡

翰兮浩予悲之莫寫

五言古詩

謝士特餉櫻桃

今年客閩中春山亦花鳥時果次第熟風露枝裊裊含
桃品居最朱實若自表高人肯見分厚味未覺少絳囊
敢鬪荔木蜜虛名棗多食顏自駐此語聞本草翩翩出
谷鶯啄取定先飽故園當此時行樹映池沼散火耀隅
隈灼目看未了翳葉色逾深纍顆核更小園人挈筠籠

金史卷一百一十一
卷一
銀甲摘清曉勻圓入彫俎擬借麻姑爪擇佳間留玩引
杖日數遠煙塵坐流落魄斷首空矯

贈劉至道

性靜乃可琴德常乃可醫二事人所難而子能兼之好
古身則潤活人功不貲未媿孫思邈何慙鍾子期俗眼
多重輕世態工瑕疵自視無所嫌安行復何疑子有賢
舅氏聞名四方馳勉矣歸問津沛然有餘師

贈彭表臣才臣

我交半天下頗接金石友相逢便論心已別更迴首三
年厄兵火水陸東南走風餐近波浪露宿薄林藪廬陵
信名邦昔賢猶見取水南遇彭子門巷似無帚胃中有
涇渭如鏡不受垢呼兒具盃盤物物皆可口新青擷嘉
蔬大白醜旨酒使我忘身世不復問升斗茫茫四海內
二子可與久我昔當少年擺落謝紛糾老來齟齬事在
十常八九尚倚筆鋒勁恃此或不朽飄零欲何歸故國
生藜莠無乃造物意窮途一假手丹楓作初寒客袂不

卷一
掩肘冥冥甲子雨山遠似無有試問夜歸舟網中得魚
否

同呂倅小飲

一日不作詩已覺神不王一日不飲酒更苦舌本彊梁
王自墮馬賈傳恨無狀寥寥千載後有懷意誰諒夫君
出世家偉一魁三相人物方輩出事業雅相尚笑我守
丘壑蹤跡更漫浪尚餘杯中物足以助豪放相逢傾五
斗老子未多讓

送嘉仲兄赴永康宰

我兄如瓊林皎皎塵滓外不從門地初便許人物最裁
詩陶謝流射策晁董輩歎唾落人間一一珠無類羣居
款名理澡雪賴箴誨坐我琅玕林清風長十倍誰令困
小官寸進而尺退前年宰滎澤與古能吏配茲入山水
國牛刀欽益淬穩借一帆風開濤上鯨背獨憐藐然孤
厭逐兒童隊夢想在東南浮雲寄心會定不俟瓜及歸
奉明光對猶當念竒窮寂寞將把耒

右司公致書顯上人并遺楮衾詩以贊之併簡

都公

緇徒中有人籍甚初與顯是非不掛口好惡不入眼終
日但怡怡言行無可揀外相示枯槁風味殊不淺初公
如鶴長昂藏誰得管今秋忽坐脫山立不少偃顯公方
晏如隨緣自舒卷平生三事衲夏燠冬不煖大雅右司
公國器乃瑚璉頗敦方外契淵明亦親遠道術久相忘
書來叙繾綣一被直千金溪簾淨冰蠶邀我置香茗撫

玩不忍展而我在家僧業習盡鉏剗琴書不療飢拙生
良可莞未識韓荊州不敏懷媿赧向來袖漫刺到門不
及款音問復後時當蒙貸踈懶公如驥騰驤我類鼈跛
蹇出處固不同投分悵已晚明年壑源春驅車望雲巘
載醪問竒字從公定忘返

溪晴獨釣

霽景如發蒙幽人事臨眺山明乍開屏水淨新拭照百
年能幾醉萬事付一笑綸巾稱芒屨持竿坐窈窕勿謂

吾釣直我意不在釣獨鶴何處來寒雲發清叫乃以聞
天聲和此登臯嘯我亦遺世人與爾豈殊調

水梔

陰泉隱巖壑長夏發幽植深處但聞香往往樵蘇得幸
不雜薪樵論價亦何直適從支郎舍遠致居士室婆娑
復偃蹇其高不盈尺鉛華了不御絢此冰雪質我有古
魚洗歲久莓苔蝕注之清泠水藉以瑤錯石靜態自惜
惜孤芳何的的初疑雲生礎復訝月過隙膏沐露穰穰

動搖風激激忽然參鼻觀似欲破禪寂俗物多豐肥仙
姿乃癯瘠已輸白玉英更作黃金實昌陽詎足數蒼蒿
誠可匹老來無所好一見心輒溺坐卧與之俱於焉遂
成癖異時張紫薇飲客盡一石放懷歌舞筵折贈無所
惜蟬蛻倏仙去樓居藐姑射三嗅哦公詩俯仰成今昔
問花花如嘖對之長太息

孝感堂

孝為百行本儒訓存六經未有仁而遺禮宜權重輕哀

嚴以事死敬樂以事生豈徒天性得乃見人道成顯顯
三彭子德事肅且馨好仁無以尚尊譽鄉有評當年綵
衣戲此日羊棗誠春秋薦霜露洒掃供粢盛新亭潔輪
奩拱木連高薨霜松無鹿犯風樹有烏鳴不慚王謝家
芝蘭秀階庭他年看崛起濶步躋公卿可為風俗勸以
代門閭旌埋蛇功亦微獲報猶爾榮豈念不忘本罔極
通無形天人固相懸昭然無臭聲請觀妙蓮華嘉瑞非
其徵

次韻德孺晚菊

屈原作離騷採菊飡其英淵明賦歸來徑荒菊猶榮此
物有至性名因君子成豈知時節過不顧霜露凝歲華
易晚晚芳物隨凋零艷色始獨秀馨香自孤清花似時
美女俗惡空娉婷由來品次定橫議那得爭公如醉翁
賢雅好違世情三嗅復三遠莫逆如友生泛之黃金杯
願言制頽齡更呼門下士哦詩同倒傾

次韻約之秋懷

野人不入俗，短褐分田舍。由來黃犢車，不受塵中駕。空
牀蟋蟀邊，陰牖蒲萄下。適然契幽懷，推枕起中夜。
粲粲東籬花，如為時節好。冥冥花上蝶，婉孌死亦抱。神
仙那可求，姑欲學不老。去去人世間，高步擷瑤草。

偶書

春事有底忙，清和風已扇。小雨出花竹，微寒生几甌。直
道每多違，修門難自厭。棲遲無與言，袖手看歸燕。

陪林茂南遊上清宮分韻得落字

百年夢一覺無事且行樂何必尋方外而求不死藥我
里足嘉處勝踐兩芒屨有來問名利掉頭告莫莫夫君
永嘉彥載酒情不薄凌晨馬首北共赴雲霞約珠宇敞
天中非煙動寥廓黃庭拜吾祖素髮炯然灼堂前繫牛
木柯葉宛如昨少陵詩之史餘光賁伊洛雖煩鬼神護
九原不可作我輒吟其傍窘恧愧穿鑿是時天已霜山
川向搖落南登駐蹕亭北上朝元閣俯仰盡形勝觴詠
得盤礴惜無羽客琴一洗塵土惡

簡友生促酒

閉門傾濁醪勝接俗子語蟹螯得橙齏風味正如許緬
懷冰雪姿何由對談塵夫君腹為笥萬卷方撐拄哦詩
送歸鴻平生無漫與十年就閒曠一日看軒翥老夫衰
病餘頽然守環堵無因少年事插花更椎鼓歲晚場圃
休黃落溪上雨溪邊雙白鷺見影忽驚舉水天渺無際
暝靄下前浦此時亦愁絕擁鼻吟正苦安得百斛舟載
取君家醕

釣臺

先生志丘壑溪山助幽興持竿聊爾爾至樂在游泳故
人已龍飛旌車遠來聘掉頭貌不顧長揖辭萬乘人生
各有願可不安吾分是在易之乾曰遯世無悶至今堂
前竹蒼翠有餘潤我行出祠下敬謁仰勝韻愧負營口
腹馳驅違本性言歸不敢遲賣劍買魚艇

題無疵庵

身無累則佚心無營故樂舍外而取內此味初不薄使

金剛口唇
卷一
君蚤聞道觀妙契獨覺不即仍不離無止亦無作庵如
大圓鏡萬象含虛廓簷空看雲歸牕靜聞雨落惟良二
千石分憂得此託蘊真愜所寓俯仰成今昨

潛心齋

古之學為己今之學為人始乎芒芴間擴克遂無垠克
己而復禮天下皆歸仁尼父百世師道妙聖且神天將
為木鐸故未喪斯文賢哉顏氏子至樂忘其貧語之而
不惰好學無與倫孟子養浩然卓爾踵後塵萬鍾與千

乘不肯易其身茫茫自聖哲六籍經幾秦末學更多歧
學海無問津伊川二先生身修道愈振當年從之游不
減洙泗濱至今士氣盛亦復民風淳柴子柯山秀言厲
即之溫由來思無邪果見德有隣潛心坐一室淡泊遺
囂紛叔視而返聽自得于見聞先生雖云亡書在傳日
新得味極鑽仰恍如入室親而我先君子實預絳帳賓
我亦聞緒餘往往書諸紳多言反成蔽目擊道乃存藜
杖一幅巾蚤晚來叩門

謝王敦玉惠雙兔

惟茲衣褐徒功用莫與大馳騁文字間下上無不載卓
哉昌黎公毫端跨百代傳紀何新奇不泯良有賴先生
胷次廣萬竅號一噫學成身益窮動輒與時背興憐不
肖子磨礱去瑕類辛勤三十年所得纔梯稗遺我雖八
蹄高義意有在想當避鵲拳岡壘如歷塊束縛諒何施
拙情甘自退筆硯行且焚重垂兒子戒方當事口腹坐
與巨觥對閉門擁紅爐大嚼資一快

送森姪赴官

郴江帶郴山逶迤入平楚偉觀甲瀟湘信美非吾土阿
咸方試吏家風在儀矩此時奉親輿行李慎裨暑別離
同姓重況我老爾許勉力事勾稽遠臣觀所主

招士特似表

山雲向晚留山雨凌曉濯花明紅欲墜松淨翠可握未
覺人意寬獨喜鳥聲樂平生麋鹿性避地諧丘壑復接
翁季友詩文贖酌酢蘿門邃宜步窪樽深可酌不聞杖

履過無乃厭
磽确願承名
理談煮茗破
昏濁

自宜興歸謁鄒德久不遇

客裏仍驚奔南走荆溪上繫船樓前樹偶接丈人行茲
惟天下士抱負不可狀而今年七十面眸背益益論文
復把酒十日共清訪歸家照眸子炯炯覺神王竭來情
所親鄒子頗直諒斯文有能事筆挾風雨壯今晨叩其
門不見動惆悵我希嵇叔夜子慕陶元亮念子如清風
執熱欲何往寇退子當返子去我曷望何時芝蘭室重

見玉色釀快意傾百盃澆我舌本強

行之金部既獲奉祠之請歸赴大阮之約詩以

高之

阮籍頗推咸謝安已舉玄盛事如昨日風流想當年
嶷次對公人物藝且賢文忠命世豪植本濬其源世家
不乏人名德見所傳郎官後來秀骨相尤卓然庭中生
玉樹池下出龍泉向來宅大憂未了粥與饘吉服事朝
請高名動陶甄青雲要平步一歲期九遷人事喜倒置

正直成黨偏一笑就閒散拂衣遽言旋及門聽傳呼和
氣驩相延共止一區宅分食二頃田遠從物外遊高謝
區中緣方須康樂屐豈問祖逖鞭人生規遠大跬步何
足言風雨聽朝鷄結束無安眠何如一丘壑耳目清不
煩嘉禾蔭沼沚可濯亦可浴有酒自獻酬醉操雲嶠篇
慕此冥冥鴻念彼跼跼鷲賤子不適用受性愚且顛晚
忝登門遊繆稱嫫母妍眷言林下期雅尚寄所便野服
袖漫刺乘涼過東阡

賦樊氏園雙花

天地有至和薰蒸效茲祥異哉桃李蹊葩萼俱作雙紛
紛承朝露一一含春陽飛來兩珍禽文采粲成章鳴集
芳樹間其音美如簧近君白玉堂奉君黃金觴君家伯
仲賢人物偉相望衣冠作嘉話何止跨一鄉永言棣華
好和樂殊未央我賦角弓詩封植詎可忘

翠微堂

為劉端禮題

我讀醉翁文想當筆如椽東坡獨知翁謂今為飛仙偉

明後來秀文亦星斗懸一旦辭世紛歸巢月輪邊大雅
久不作劉子藝且賢筆墨所橫潰折衝遂無前向來坐
位書一日萬口傳不慙顏魯公易地則皆然身閒無事
日日涉五畝園圖書破百金花石費萬錢子真隱谷口
摩詰居輞川淵明道上醉知章井底眠風味有數子較
量誰後先君乃於其間并得四子全高堂納日月竹樹
森以聯覽彼不盡景樂此無窮年前山若飛來倚斷西
南天灝氣濯蒼玉晴陽生紫烟固疑融結異真恐造化

偏想像山中人因之招隱篇我家居洛陽門巷伊水連
吾廬蔭清竹不受車馬喧一來升君堂撫事情悃悃交
淺言已深勝處相磨礪却來從杖履已辨幾履穿折簡
王夫子載醪攜嚮泉

題東坡枯木

先生萬卷讀命世文之豪矯矯鸞鳳姿仰止人物高坐
石翳白拂古繭磨衲袍玉堂揮翰手不數乘與褒前身
老畫師寓興時抽毫要在胸中竒醉筆隨秉操拓原沙

錯錯獨樹風騷騷天荒鳥不入路絕人告勞一旦辭世
紛御風歸次寥遙知紫玉府冠佩方遊邀不然跨汗漫
騎鯨弄雲濤夜中夢見之酌公以蒲萄覺來空把卷我
心增鬱陶

送翁子秀歸泉

昔從大小阮日為林下游酒熟無孤斟詩好不易酬形
影一參商書問缺置郵渴聞盛德事仰止東家丘大阮
今養高譽望老更收小阮遂長往歲月已載周人生一

世間所重惟交遊而我憂患餘身事良悠悠阿戎遠來
過整整儀矩修話言極敦篤道舊何綢繆蕭寺夜寒深
風雨鳴颼颼秉燭如夢寐愴恍一夕留明發又告別行
色不堪憂贈言加餐飯心折涕泗流

贈術士

君平隱於卜百錢非少多術妙語更簡數精心匪他羣
書了在口誦解如縣河馳聲日籍籍問肆肩相摩小人
惡切直先生無詭阿有時隘窮巷軒冕紛巍峩朋來競

金少日人二
卷一
徽福習吉理則那從而再三瀆不告反嘲訶少焉一闕
散簾前可張羅要知安分者魯叟正波波

叔父作壽藏

昔聞劉伯倫荷鍾常自隨又聞陶元亮自作挽歌辭人
生一大夢未了黃梁炊有初必有終此理夫何疑大阮
吾宗傑德事見所施後凋難老質壽考當期願開阡營
兆域預卜青烏期無乃大蚤計究竟良不癡一旦與世
辭於焉乃真歸庶幾達者觀永謝高人唾山川蘊嘉氣

雨露竹栢滋于公更高門駟馬來不遲

將至蘭陵道中以遠岫重疊出寒花散漫開為

韻

我如萍不根有往而無返天涯與地角孰能量近遠故鄉無巢歸流落歲時晚幸負平生心何由見嵇阮

故家洛陽隅煙林接雲岫社酒無俗期柴門有清叩傳聞俱丘墟淒涼兵火後祇應秋夜月松竹影如畫

驚颺起羣鴈落日明孤松溪駛石齒齒樹斷山重重功

名貴及時丈夫不可慵初不繫賢愚祇繫其所逢
故人限南北昨日夢寐接朝來得素書開緘意稠疊別
時贈吳鈞瑾粲猶在篋因循愧遲暮欲見煌煌業

王氏墜塗炭志士懷憤鬱豈無卧龍人想待三顧出從
容命世豪肯為庸主屈英名如白日千歲常不歿

舟子厭牽挽峻瀨凌風湍煙霏麗初日水氣生早寒
齶物直六伯始歎生理難一月不食肉悽然對盤餐

客程方浩渺念此道里賒秋林傷客情霜葉色勝花溪

魚不論錢我飢豈無涯何當見昇平四海如一家

溪行日有趣便欲老絕澗復懷少陵作亭午氣始散客
子鬪身強尚得加餐飯弟兄杳何許不及沙頭鴈

早希馬少游下澤而款殺一官聊爾爾此志亦復漫東
薪與斗米未足了晨爨人生固可憐況復更憂患

小黠而大癡耄耄均童孩當其有酒時且共笑口開淵
明真可人吾廬歸去來我今無吾廬念之寸心摧

送范才元

古云七尺軀不及一尺面紛紛閱人久過眼今乃見吾
弟外門傑籍甚東周彥瀾翻倒三峽浩博橫萬卷不減
王夷甫似是曹子建抱負三十年始遇相君薦聲名徹
當宁賜對金鑾殿乃不留石渠頗動薦紳歎大藩須接
察此事君亦漫遙知閉齋閣幽討在几案歲月局上消
山水琴中玩官池本不渾慎勿驚魚亂明年麥秋殘荔
子承清宴即席洒椽筆可醉風味獻歸來佐中興密勿
膺帝眷不忍話艱難江淮尚酣戰乃翁月旦評飽學富

文翰當年蒙賞音，好我置華饌，侑觴出歌舞，色溫微笑。
繁回頭，隔生死，拊事臉必泣。而今百無堪，老大足憂患。
讀書祇自誤，株愚不知變。平生一丘壑，競此豈其慢。正
可卷而懷，安於素貧賤。故鄉無巢歸，客子鬪身健。功名
要晚就，婚嫁須早辦。浮萍偶相值，悵此臨歧餞。更待南
鴈回書來，警衰悞。

送張巨山

士為知己用，亦為知己死。嘉哉孔文舉，特達惟薦禰。寥

寥千載後此事今已矣俯仰常有懷邂逅過願始襄陽
紫微公操行見所履字如入草蛇詩繼餘霞綺家聲鳳
凰池盍在金門裏三年民父母政事榮可紀倦游丐閒
歸解紱如脫屣東山寧久卧行為蒼生起要觀補袞功
左右聖天子小人不更事豈解令公喜平生萬卷書不
直一杯水頽然衰病餘所存今復幾與世竟悠悠逢人
但唯唯從公文字飲德言方在耳胡為舍我去衣袖不
可褻離合亦偶然世事皆如此聲出已復吞相顧淚如

洗

送榮茂世

戎馬絕黃流飛塵暗京畿竟成王室禍痛定不忍思衣
冠半陷沒逃難皆散之有水衡君將命弗顧危躍馬
赤手出扼隘河之湄中途被衝突星夜西南馳回頭望
城闕曼隔母與妻半年無家書欲言涕先揮微身亦曷
愛所憂國步隳倉黃偶不死定省陳苦辭汴水六七月
橫泛被兩隄河渠忽中乾漕輓功莫施不効輒加罪散

秩總厥司相次下維揚庀職從六飛衆人之所畏遠害
夫何疑春來儀真火鼠輩輕王師偉哉馬氏妹貞節不
可欺終焉兵在頸視死端如歸何慙古烈婦事與日月
垂君性根孝友而不求人知方其聞孽初對客神若痴
如悲不敢哭上念親老悲豈惟識者悼行路猶歔歔茲
疇魏樓功叙君官甚卑幾年始見錄孰為公是非君懷
有直氣不為寵辱移朝來又駭聞白簡停官資索馬亟
往唁我心有不怡君乃笑迎我喜色見睫眉曰此造物

意巧以從其私舟楫密已辦生具亦甚微稅駕不可必
苟全其庶幾我貧君不厭交契管鮑期去意尚勇決升
斗不足縻春風鼓河水立岸看解維四郊鼙鼓聲問君
此何時

送程思永

恭惟文簡公雅意在人物一時推鑒裁似秉素許術草
草材館盛多自東床出昌黎宰相器氣宇吞溟渤門闌
最前席褒借難具述愛賢前輩事此道今誰卹我生獨

何後歎不及湔袂聲馳翰墨場興盡雲霞窟古來豪傑
士可殺不可屈塗窮暫時爾被褐未宜忽之子乃名裔
秀典開風骨尚勉激頽波典刑庶不沒

送范彥覃

春風惱百物物物不禁渠水為盞盞綠柳亦穆穆舒芳
菲遽如許流光亦須臾誰令更別離此恨當何如外門
有人物照映冰玉壺茹古髯似戟說兵膽過軀中外已
踐更能事乃緒餘主饋益光賢郎君千里駒人生得此

樂底事猶區區茲行謁賢相袖有時政書世家治劇手
陶冶寧舍諸我老不適用飢寒出無驢論親無黨近分
義何敢踈吾兒似我拙久已分龍猪一聞詞賦功決科
良起予山林與鐘鼎願言今則殊歲寒苟在茲勿忘雙
鯉魚

芙蓉

佳哉木芙蓉秋晚芳意足偶植華堂下似續淵明菊
此好顏色可玩不可觸始見開二三旋已放五六濯濯

晨風吹鮮鮮宵露浴非闕競時節庶用慰幽獨我老百
念空掃迹坐林谷猶作煙霞想久絕脂粉欲三徑阻幽
事吟苦顛毛禿河洛未休兵媿負盃中綠

欽定四庫全書

崧菴集卷二

宋 李處權 撰

五言古詩

元夕陪張使君燕集

老大於節物真成風馬牛出山赴嘉招敝袍廁英游簫
鼓市井隘綺羅人物稠嫦娥亦飛來餘光上簾鉤使君
民父母謠頌布政優牙旗錯綵繡康衢看遨頭夜氣燭
光滿春寒香霧浮中興太平象郡國皆魯鄒豐年入醉

金方曰卷之二
鄉頌白卧道周遙知蒼龍闕宴啟華萼樓惟公班馬手
斯文擅風流行歸侍嚴宸玉堂聽更籌獨憐衰病客鬢
毛蚤驚秋頹然賓裾後報德慙應劉

簡申甫求畫

平生金石友參商幾睽阻二年更喪亂流落隨處所夫
君丘壑姿鴻鵠杳騫舉超然有能事妙絕見心苦蒼茫
尺餘松黛色起烟雨興來灑風竹六月無裨暑又嘗作
平遠近代未可數奈何於吾儕一筆獨不與我有敲冰

練度越世俗楮煩君作橫卷放意寫湘楚

次韻翁子秀移竹

嘗讀東坡詩不可居無竹況此真琅玕一一溫如玉得
非瑤池種阿母所愛育一日三封植近之誰敢觸山僧
不知貴遣送如薪束坐成阮家林色映兵厨醪主人何
必問抱琴來就宿此君不須多瀟灑數竿足却笑陶元
亮但採東籬菊

哭駕部舅 并引

吾母棄諸孤一年季舅駕部公奄即泉路天
喪明哲殆及斯文吾舅德容德言濟以問學
郎官使節未為達官人望之已如泰山北斗
矣廢居幾二十年以沒其身平生抱負不盡
用於世然士之賢有識者咸能道其平生又
何憾焉某銜哀力貧走五千里覲一見吾舅
以訴孤苦將至其前遽聞訃音如中鋒刃不
知涕泗之橫流也世亂身危苟生何益因追

想作詩哭之云

外門推望郎天啓眉幹白揭揭廊廟器仕道無枉尺仁
義允蹈之言行可法則優為君子儒彬彬見文質伊川
有夫子四海尊學術燕申鄉里化語默世不識公時列
高弟見獨蚤入室從容為邦問領略濟時策海涵而地
負光輝日充實向來坐省中能事已籍籍出入羣公間
持論頗正色皦皦活國心周召可輩伯朝廷公議喪牛
李計方得道大固不容青蠅工點壁知難襍被去迴首

帝閭隔嗟嗟已衰俗弗俾蒙其澤出把使者節顧未遠
親側榮耀老萊衣孝心惟惕惕溫尋故時學委蛇山水
國澄清足暇裕薦延頗推擇宛彼南陽族食指居數百
衣冠日零替貧有未葬骨慨然斥餘貲黃壤即安宅于
公已高門叔教有陰德敵馬禍中原南遷例奔迫故林
無巢歸瓦礫漫阡陌艱難更道路扶病親藥石肩輿豈
久堪命數奄茲厄銘旌瘴煙裏過者為悽惻無兒但有
孫尚可付窀穸墳墓五千里河洛兵未息招魂動楚些

路遠迷南北，鯁生愧無似。忘年罇俎客，提攜在斯文。恨
不借羽翮，去春失所恃。鉅痛摧肝膈，銜哀赴喪所。寸步
且如棘，猶期見渭陽。慰我孤苦極，傷心捨我去。淚落滿
裯席，遙知凜生氣。千古猶不沒，夜中夢見之。話言及疇
昔，謂公猶在世。眼明失心疾，山風忽驚起。月朗清露滴，
食石鱗。

異時柳州謫，居食蝦蟇人。情尚隨俗此，道誰疵瑕窮。
工見文字制作排，淫哇作詩報昌黎。想當劇雄誇集中。

此篇亡恨不窮天葩人生一飽止何事須魚蝦我鄉實
西北柯山偶藏家土人重石鱗充饌蔑有加商論及品
次衆口時紛拏朝來有分甘珍味到齒牙籠粒坐剝雪
壺漿薦流霞此物亦易致我饑其有涯兒童還可笑遠
峴去攜叉

感春

春風欲裂石春雲如鼓濤況復橫來雨簷溜聲連宵時
人早盥幘散目臨亭舉挽折戶外柳吹殘竹間桃慨然

念芳物摧抑適所遭因之感時節幽憤空怱怱少年亦
棄置自引瓶中醪醉後眼生纈孤坐清吟高

聞梅

巖寺報梅開可是知時節映竹已蕭疎臨流復清絕正
須幽士賞莫縱狂僧折山寒雲霧深日暮更飛雪

雨後凝秀閣口占呈子方

春雲向晚留夜雨凌曉濯花明嬌欲語柳綠淨可握化
工了無盡芳意殊未覺燒筍薦清尊此味初不惡君知

金方山先生集 卷二
忘憂物便是却老藥百年終一炊無事且行樂

陪張巨山謁清獻公祠

惟昔清獻公二年蜀中歸歸載無長物一琴而一龜龜
屬煙霞想琴寓山水思婆婆二物間德容儼怡怡元龍
豈時輩康樂匪俗期書齋質不陋覆之以茆茨手植參
天松亭亭歲寒姿公去幾霜露高風猶在茲可使貪夫
廉至今仰伯夷使君挺孤潔後身蓋亡疑治體簡而肅
民俗醇不疵竭虔拜公像雅有賓僚隨置酒延公孫誠

意公所知表表孝弟里人物固未衰德厚者流光此言
良不欺春陰澹物華鶯鶯原隰滋遠山出雲氣近水餘
風漪時禽屋上語野蝶筵中飛此堂歷千載盛事傳一
時凜如公在傍冠弁不敢歌庶幾飽公德滿酌其可辭
聊以永今朝晝景方舒遲

贈高老

野寺何所有梅花如玉盆客愁浩如許我聲已載吞大
士坐丈室煥若陽谷溫從來第一義入耳簡不煩不謂

兵火餘見此祇樹園仰沐方外契藹然風味存我詩如
廢井已涸寧有源又如既老馬力盡不復奔空餘浩然
氣踵見常焯焯熊經非我事詎以胎息論蒙莊豈達者
區區說鵬鯤何如柳下惠坐令薄夫敦殊方對節物淒
斷遊子魂山晚雲欲雪陰風樹雅翻不見柴桑翁此意
無語言

送禪客入高峯

茫茫人間世佛法最長久山林坐九年面壁不掛口須

是丈夫兒懸崖能撒手為語學道人何須天下走夜寒
雲去盡橫參掛南斗我已辦青鞋要聞獅子吼

贈寶勝主僧

木落山重重溪長雨霏霏雲慘傷客容風饕裂征衣我
行已千里恨無羽翰飛倒帆近古寺煙鐘深翠微明軒
快遠目俛仰涵清輝上人惠休輩道眼與世遺匡床竹
火爐脩然自忘機餘生尚奔迫所遇非所依天地兵革
滿鄉闈音信稀拊膺坐長嘯歲晚將安歸

戲贈巽老

學詩如學佛教外別有傳室中要自悟心地
方廓然悟了更須坐壁下三十年他時一瓣香未可孤老禪

江郎峯

壯此江郎峰何年儼而峙融結自太古造化鍾一氣
屹然居獨尊羣峰俱不至如冠劍大臣廷諍而出位大哉
天地間覆載不敢議此峰有四面面面各異勢撐空方
突兀傲世不嫵媚我昨玉山來雪罷煙收霽川平如湧

出蕩漾浮蒼翠已遠更回頭眼老猶決昔眷言須水陽
稅駕得巖寺黃童與白叟追逐兩閱歲勝踐在咫尺心
賞適寤寐塵勞不鞭後俯仰徒自媿會待秋風高杖履
窮幽邃雲深月滿山儻與神仙侍

簡士特

春來雨鳴屋夜靜雷破山客子嘆身世曷以舒心顏高
人不事事結屋蒼翠間松竹不改操鴻鵠何由攀想知
於此時齋扉猶未闕短檠書史倦危坐聽潺潺

讀書

西風吹雨來濯此青琅玕黃華媚幽獨秀色如可餐我
居適在野門庭已荒寒老屋四壁立生涯堪鼻酸向來
頗好飲無日無杯盤而今廢升斗百憂何以寬惟取架
上書拭几支頤觀偉哉聖賢旨妙處言莫殫如渴遇新
汲醒然開肺肝因不求甚解會心亦解顏茫茫百年中
毀譽非一端要知仁與義多出貧賤間相逢勉為善世
路良獨難誰能逐狂癡凌競趨險艱何以易此樂此樂

居之安

雪中赴德孺燕集

北風夜號呼逗曉雲已罩臘雪及春來佳瑞故難料舞
空復低徊投隙乍顛倒山川若為容松竹不改操斷隴
失坡陀連峯增峻峭瓊堆與玉立南北淨相照獨鶴無
處尋田中發清叫疎梅有時見水際含笑晏表昔所
慕王冕可同調江練好催詩公乎今謝朓

題呂季升谷隱堂兼寄居仁

草野隱於耕傅巖隱於築叔夜隱於鍛君平隱於卜四
子隱不同抗志俱超俗夫君無所事掃迹隱於谷優游
以卒歲燕居常慎獨方寸湛若水顏狀溫比玉白璧無
瑕玷幽蘭自芬馥插架萬籤書擁簷千挺竹時乘月
過自伴微雲宿蕭然伏臘餘尚不愧此屋豈曰不願仕
可以速則速富貴草頭露榮華風中燭止止理固明知
止乃不辱小人無藉在放浪謝羈束衰年迫飢凍強顏
隱於祿晚食且徐行分量初易足婆娑一丘壑雅趣在

松菊平生喜文字終恨窘邊幅
聞多種林迎寒釀已熟更約
阮仲容清談夜更僕

陪約之宿東禪

倦遊得茲行頗愜丘壑性俗慮與秋澄禪
心隨夜靜燈前見脩竹月下聞清磬
未作故山歸空吟長卿詠

壯禪

老屋不知春餘花紛委雪中
有忘言人截斷天下舌
我久執情見終日在談說
一笑示全機春雲滿城闕

送岑婿歸許昌

恨我生不早不拜蘇范岑
俛俛斯文中永歎一何深
世家潁川上萬卷脩竹林
相望羣玉府清風猶至今
合好一大事遺訓敢弗欽
求之且彌年齊大肯見臨
侍郎著清德溫厚如球琳
吐而為文章中有太古音
嗣孫固多賢玉立俱及尋
近坦東床腹執禮不免簪
留連歲將晏離索秋正陰
往崇丘索志用壯爵祿心
一盃須重持為子商聲吟
當復記衰懦病懶何可箴

陪陳叔易汪彥章登浮翠亭

羣峰如高馬飛雲若為馭蒼翠來無際擺脫欲仙去我
時登茲亭物色生四顧同行有君子粲笑隨杖屨樵蘇
自生理孤煙橫匹素歸鳥楓樹林天高西日暮不見髯
將軍長橋斬蛟處安得起斯人扶危正天步平生江湖
想齒髮凋行路倘有百斛舟載酒經煙霧

環照閣口占呈德良

高情接巾屨雅志在丘壑林疎見鳥下池靜聞魚躍歲

月已屢改風煙只如昨
我知造物心遺子良不薄
畏途有豺虎駭浪有蛟鱷
何如遠憂患共此吟嘯樂

撫松堂

為王晉玉題

大人居水南未省價高索
平生丘壑事長嘯天宇窄
舍傍五株柳宛是陶家宅
舍南數畝園似與人境隔
方須漉酒巾漸喜扶老策
以茲不願仕偶然似彭澤
青松手所種撫之無愧色
都忘歲月徂不受霜霰迫
是身等浮雲術也可不擇
持此百年間常恐中道畫
曠哉遺世情

遇我眼不白問我來何時胡為久於客我官亦易拋行
矣勿多責方從倦飛鳥望林整歸翮

雙松堂 為李舅題

對植是何年巖巖挺寥廓風雷已屢起霜雪終不著先
生立其中偃蹇相參錯高標與秀氣鼎足冠伊洛想此
堂成初來賀紛燕雀醉哦淵明句衆鳥欣有託偉哉拔
俗姿聞見窮浩博鐘鼎列珍玩圖史諧至樂小人辱忘
年高義見嘯諾詎敢窺藩籬庶遂飫糟粕南池俯空曠

倒影如衡霍乘月抱琴過坐石幽弄作

面山堂

青山不遠人人自與山遠好事或致之來赴不待挽夫
君有丘壑於此興不淺昔為谷口鄭今是竹林阮雌黃
不掛口青白常在眼官居真吏隱衙鼓自早晚常令遠
趨走俗冗盡除剗朝夕面蒼翠無事日把醞填門氣象
豪入戶雲煙滿詩成足風味醉墨自舒卷我獲一日雅
甚愛王戎簡儻無絕交書定過嵇中散

十月十日陪張丈奉高雅臣德器凌波亭小酌
漂流劇東南所歷過所聞始及廬陵郡俯仰尤不塵榻
來未敢忘事賢友其仁翹翹蕭與李拔萃而多文蕭君
辭蓋寡空林蘭自薰揚鞭捨我去意欲樹殊勲李君舌
尚在真氣凌秋旻掃門與我俱軟語迴陽春客舍甲子
雨八荒同一雲傾蓋有彭子微言時解紛愛我忘其陋
肯顧羅雀門從容香積飯可口謝八珍張公丈人行氣
宇老而淳舒吳無俗姿信是德有鄰籃輿復聯翩去指

江之津坐中皆我輩者藪來逡巡把盞屬形勝領略難
具陳山寒更宜遠江流復沄沄大哉開闢功孰測造化
源掛席者誰予其來自無垠兢兢載萬斛微取何其勤
落帆占近岸過逢慶欣欣方矜猗頓富誰信管鮑貧鳴
雁何處來冥冥初不言亦知箇中好嗚呼下其羣商羊
不覺舞漁父收微緡煙樹僅可識歸鴉喧水村我昔觀
畫圖對此猶心存恍若夢中事有懷攜酒樽客子鬪身
強身外安足論無事頗相見斯言吾所敦

月夜鼓琴

清風泛寒露，夜久氣轉涼。
恍然幽夢覺，明月及我牀。
披衣起，獨坐愛此數尺光。
興來御桐君，正始其可忘。
山高既峩峩，水流亦湯湯。
方當志獲麟，故宜鄙求鳳。
永懷嵇叔夜，復思蔡中郎。
妙處與心會，樂哉殊未央。

次韻叔羽聽琴詩

嶧桐斲孫枝，所取非老大。
比其爨之焦，孰謂邕也過。
拂拭見太古，斷腹宛蛇卧。
持來長安市，萬口莫能破。
愛公

胸次廣雲夢吞幾個夜堂發孤彈風月清入座高山不
易賞白雪久無和且樂舜絃薰母事楚臣此

退老堂

我公自言老能事如少年我公自言退人材望陶甄公
功在本朝本朝方賴焉公德在斯民斯民寧舍旃中年
倦政幾去若浮雲旋名山占形勝築堂蒼翠巔窪樽為
壺觴虛籟為管絃招攜足賓客嘯傲窮雲烟胸中萬卷
書三峽傾詞源興來不停綴摛華筆如椽登臨出妙語

珠璣落清圓不數劉白輩一斗真百篇裴傅堂綠野贊
皇墅平泉東山謝安妓五湖范蠡船四子之於公器業
微差肩公之於四子趣尚并其全公術可活國公力可
迴天蒼生望公起天子忘公艱佇瞻丹鳳詔袞衣來陛
前三八知眷殊一夔見任專發揮中興業開闢造化權
拯焚而救溺持危而扶顛雍容復密勿造膝陳一言長
驅卷沙漠擣穴空腥羶談笑九州復懽呼兩宮還四海
各安堵六軍同晏眠躋民入仁壽致主登光宣圖像冠

雲臺勒功照燕然功成了不居高謝區中緣拂衣赤松
游辟穀求神仙去去蓬萊路雲螭不受鞭

題周氏棣華堂

管蔡既失道周公遂相殘召公乃賦詩棠棣良可觀聖
賢尚如此末世詎得安斗粟與尺布至今興永歎汝南
賢伯仲鄉評藹芝蘭水清而玉潔友于甚相懽鴻雁識
先後鵲鳩知急難同衣且共繫怡怡生理寬堽筮翁和
樂學海闊波瀾好爵豈終靳未用詠考槃他年表門閭

紫荆出簷端

題瑞松亭

德積固有源吉卜可無地要知青囊術詎盡黃壤計翁
族鼎七閩籍甚月旦議五車聞善訓三遷見深意父子
兄弟間接武廣寒桂世方慕朱紫此道非我貴而今二
阮賢風雅果未墜娑娑竹林下頗用文章戲諸郎赤鳳
麟唾手可高位惟松歲寒質似抱君子器偉此無情物
胡然效斯瑞天人理則懸聲聞在交際我行幾千里歲

晚飄零至升亭整素冠敬仰動長喟塚木助芊芊前山
益佳氣

召伯祠

我行出陝右來升召公堂歎公不可作祇令吾道傷優
哉聽訟日斯民歌樂康善教被南國美蔭餘甘棠惟公
與周公左右相成王孰知二公心千載惟蒼蒼人不學
二南其蔽猶面牆先聖垂此言下士其可忘太史述世
家源深者流長公澤亦至今風烈殊未央再拜仰公像

冠佩猶煌煌，裊裊不能去。淚落征衣裳。

題九江徐使君眇柯亭

庭植何天矯，蒼皮餘雨溜。本非尋常材，歲月方成就。偉
此蕭散姿，眇眇揖孤秀。慕陶築斯亭，千載可同臭。引杖
步嘉蔭，攜書席永晝。舒嘯一徜徉，清風滿懷袖。更想五
老峰，傑卓立癯瘦。何因借羽翮，接踵賓裾後。

次韻陳叔易三首

草碧波復綠，南浦愁送君。君行將何之，愴指南北雲。相

金瓶梅詞話
卷二
思無早晚生離無近遠悠悠闕塞阻杳杳音信斷青燈
挑已盡夜長方展轉

東鄰有豔婦傾城室家索西鄰有貞妻空閨守葵藿良
人萬里去豈為鉛華落君心諒不移妾命由來薄天地
終無情人生復何託

馬鳴旌旆搖雪滿關山道白草連雲中羊腸復縈繞別
離工損神宿昔已枯槁却望南飛鴻驚弦亦虛橋祗應
馬上曲偏能寫懷抱

將遊西池偶書

去年客中愁忽忽意未伸歸來媚兒曹行樂猶及辰融
怡帝鄉日浩蕩天街春物色豈不好所思難重陳婉孌
有能事朱絃妙通神從容蘭臭言事事皆可人關河一
乖隔夢想清洛濱況乃行止間愧負匏瓜身情隨節物
改事逐風景新躊躇不自釋淥酒徒芳辛明朝更牽強
接踵肥馬塵凌波固可慕解佩良無因青翼不復來悵

望瑤池津

紀鶴

青松百尺餘宛彼山之陞白鶴巢其高皂鶴巢其卑紅
鶴不敢來下巢楓樹枝陽春一動蕩百鳥俱蕃葦網繆
各盡力草草成藩籬卵翼與哺育不媿烏鳥慈清晨求
食去鼓翼遠奮飛斯須復來還亦有蛇鱸隨引頸鳴相
呼所憂非渴飢不日毛羽成頡頏下陂池浴之以清泠
弄影相娛嬉既久遂不來遠舉將何之高山與深林浩
蕩信所歸明年又當至復作今所為我為唐虞世鳥巢

何所窺亂來纏兵火殺氣滿四維人羣失安居恨無羽
翰施偶此共偷生偪仄何可辭憂患亦所同去就可弗
思網羅非爾事彈射不爾私近辭燕雀喧遠與鴻鵠期
相望在寥廓大翮如雲垂時來松樹間聽我哦此詩

玉簪花

秋露日以繁秋氣日以清愛此堂下花色好香滿庭藉
之青玉葉表以白玉英微風過披拂小雨來滋榮我老
味更薄與世無復情頽然衰病餘見花猶眼明俗客不

到門取琴花前橫小童為席地取酒花前傾昔人工比
物言簪豈虛名願登君子首雅與冠弁并

溪橋

昔人愛仙掌歸時倒騎驢風味顧不淺豈以俗士拘我
來過溪橋效顰返肩輿異世頗同懷往者不可呼是時
秋冬交霜後木落疎人家在窈窕溪山如畫圖我老尚
羈束媿爾鶩與鳧川光媚煙景泐戲得自如人生一世
間過眼皆空虛偶然及勝踐臨覽復起予尚當風月夕

藉地倒一壺意亦不在酒得句聊自書誰能五侯門長
缺歸來乎

聽照曠塵外琴

老全冰玉姿不受一滓塵彈琴看飛鴻自是千載人幽
蘭寫國香白雪迴陽春邈視嵇阮流不肯加冠巾絲桐
得心法二子入室親高山與流水領畧難具陳前年出
闕意浩蕩誰能馴跌足兵火圍所遇多苦辛却來湖上
寺翳拂坐石門頗有名勝士宛然交道存寄書亦及我

匪但通寒溫問我能來無媿負匏瓜身翩然如野鶴接
羽凌秋旻過我晉陵郡促軫風露新諧和下鸞鳳幽怨
出鬼神老全殆不沒千古名知津漂流更喪亂我生乃
不辰見子顏色開慰我羈旅魂我心亦清苦久願丘壑
鄰何時舟載月一弄秋江濱

翁士特李似表相過小酌分題得躑躅

我無錦繡腸而居錦繡谷春風二三月山花名躑躅芳
鮮照寒澗窈窕映修竹化工亦耐事造物能委曲不知

幾猩唇貸此色可足看久直欲燃況乃手未觸杖藜兩
幅巾人物俱驚俗方觀筆端妙更對盃中醪念昔嵩少
步千層上雲麓政似徐熙圖寫生開百幅懷歸阻兵火
夢想如在目會當返昇平柴車駕黃犢

家君為張大明叔段丈處厚作詩集序小子贊
之

二老學而窮超然以詩鳴雍容三百篇一一韶與諤挺
特記水詩彊梁與古爭寂寥會隱篇澹蕩遺心營珠璣

金步曰居卷二
卷二
淪瓦礫有時應夜明過者劇千萬豈無一不盲我父實
久要早以文會并茲來唱無和樽酒懷平生遺篇乃見
屬悼往泯厥聲歔然奮長筆撫實無過情而今且誰託
兩族俱凋零從古作者意所務非近程徐觀百年內污
世曷足名

寄題向伯恭薊林

薊林近知名悵望江干路無因從之游夢魂幾飛去侍
郎天下士罷識廊廟具詩似王右丞文如韓吏部勇退

不待年蒼生思謝傳幽棲新卜築日涉已成趣人物在
籃輿風流稱掇屨身閒魚鳥近心遠烟霞聚淨几展圖
書踈簾約風露時傾清濁酒喚客坐飛絮江鱗白可膾
野雀黃堪茹懽言忘賓主脫帽方箕踞手揮玉麈尾故
自有佳處拄頰欲招隱撫髯知得句快當走尺書徑拉
王文度

次韻張匡山使君郡齋對雨效韋蘇州體

坐歛凝香霧卷簾松竹青新霜戒微寒遠日朝霞頽過

午時雲族其濛見初零蕭蕭打葉響漚漚依簷聲幽鳥
故格磔寒蜂自鈴蜩梭君曲江裔句含萬古情端知意
有在復契心所冥至哉蒙莊言為善無近名天殺久已
解世網詎可櫻寄謝夸毗子胡然事蠅營

次韻元章黃岡春雪督二姪詩課

夜雪駭羣峰春寒僵萬木山齋無所為高卧仰看屋凍
雲飛不去就我簷下宿平生柴夫子能事立於獨蚤直
渭水鈎晚懷荆山玉陸地詎能沉世侯終必復不見林

中蘭無人亦芬馥暮年一丘壑避地歌同谷散誕水石
間清涼日三沐笑人強解事閉門作龜縮一世竟何成
萬事蛇著足二姪瑞家庭貫穿經史匱才如射虎將中
石猶飲鏃詩成出連壁墨妙粲牋幅乃知作者心求益
不求速我年及學易方究大小畜儵然對此君苦節更
森束嗟今但洋洋悼往寧逐逐願借鄴侯書盡閱三萬
軸無因訪煨燼歎惜邯鄲日

雨望

寒望暮雨來隱見田中路紛紛黃雀起冉冉行人度長
林相蔽虧連岡莽迴互莫作異鄉悲百年均暫寓

欽定四庫全書

松庵集卷三

宋 李處權 撰

七言古詩

望靈石

杖藜出望江郎峯清輝秀氣在眼中當年何人運神斧
剗削碧玉成芙蓉平地崛起五千仞浮雲落日當秋空
東西南北千里間他山莫敢來爭雄英靈往往在人物
異時傑出聞數公偉哉高厚職覆載儲精毓粹良未窮

時予家世本伊洛四時行樂都忘慵樓臺面面得形勝
錦屏女兒鳴臯萬十年戎馬斷歸路流落江湖今一翁
平生所得在黃卷昔賢今聖獨見容青衫憔悴百寮底
猶欣收此筆硯功聲名突兀不磨滅要與此峯相始終

歲晚諸君送酒賦長歌以謝之

我有經綸天下之大志陶冶萬物之雄心上書幾欲自
薦達君門無籍不可尋歸來撫劔星斗近老去援琴山
水深混迹漁樵友麋鹿興發時為梁父吟霧雨方寒蔽

林藪黃狐跳梁蒼兕吼歲云暮矣人白頭納履踵決衣
見肘茫茫大塊寧終久青史功名誰不朽昔賢遠觀有
至言破除萬事無過酒朝來叩闕聞剝啄長鬚致簡喜
且愕滿壺傾寫清若空一醕衰顏返丹渥此物難從俗
士論古今與世收竒勲寒谷可以迴陽春澆風亦使還
其淳書生分量當飲溫聖清賢濁何用分濁醪有妙理
引人著勝地乘隆且不知焉知物為貴揚雄嗜飲而家
貧玄嘲尚白費解紛屈原獨醒良自苦湘纍空有此招

魂一石亦醉淳于髡五斗解醒劉伯倫卧輿當道陶淵
明騎馬似船賀季直吏部有時甘盜甕丞相他年容吐茵
古人已往不復見忽然舉觴如對面窮通得喪寓於此
且暮方齊死生變拍浮池中固不惡麴壘糟丘仍不薄
一杯一杯復一杯身世兼忘乃真樂不可一日無此君
今吾於酒而亦云安得四海盡種秫春臺壽域長醺醺
士貴要予賦水輪因廣之幸率介卿同作兼呈

郭宰

吳儂踏車繭盈足用力多而見功少江南水輪不假人
智者創物真大巧一輪十筭挹且注循環下上無時了
四山開闢中沃壤萬頃秧齊綠雲遶綠雲看即變黃雲
一歲豐穰百家飽今年小荒入菜色斗易衾稠逮昏曉
古來善政抑兼并貧富相通俗淳好閑糴待價良忍哉
客主遑遑不相保令尹賢於鄭子產視民恐傷心皎皎
朝來戒諭甚丁寧令下翕然風偃草我今亦有在陳厄
回首田園迹如掃他年歸計一塵氓抱甕甘同漢陰老

次士特韻寄德久牧之

家山鑿龍似修眉中有伊川寒更綠吾廬亦復遠城市
舍下清流環幾曲四時幽人共吟醉飲若長鯨孟要覆
三年芳草怨王孫定有金錢無處卜南征際會竹林阮
兵厨况有酒百斛夫君筆力抵萬鈞所當穿徹如強鏃
義形抗論及朝政正容凜若冰霜肅因君遠憶鄒與張
疇昔之言皆可復二士揭揭廟堂器用之艱難一變足
空令兩行壯夫淚回首盡向燕雲哭我心之憂正謂是

夜中興嘆仰看屋相思歲盡書不來念我衣單體生粟

再次士特韻

愛君直似朱絲繩遇物可折不可曲三仕無喜已無愠
肯學時人走巫卜平生不作吠堯事乘矢猶聞去其鏃
至今莫可奸以私尊視正冠何太庸歸來田園不改舊
歲寒見此猗猗綠絕交未怪孔方兄有酒盈樽書滿屋
小人傾盖已蒙潤遺我珠璣不論斛使我竟夕搜枯腸
魚目非珍何敢復我今已似雲無心江湖不說虛舟覆

言乘下澤與款段蚤莫少游良易足慣者赤脚老婢悲
亦任索飯痴兒哭皇天其忍殺善類支離亦受三鍾粟
聽彈廣陵

時風正薰彈廣陵亂世掩抑呻吟聲孰謂嵇康敢不臣
此心炯炯難自明荒楸古墓鬼神嘯大澤深山龍鳳驚
我來聽此可無語天乎孰謂得其平

普月新寮

百年均夢幻俯仰在一室况乃物外人身閑有餘力朝

來忽改作軒牖開虛寂匡床竹火爐
几貝葉帙清風
常入座飛塵不霑席煮茗焚香淨
掃除賸種松杉障西
日

陪曾宏父登冷泉亭望飛來峯

何年此峯獨飛來羣山讓秀中
崔嵬神剏天畫不可狀
仰視孤高摩斗魁蘊靈產此萬
珍木隆霜幾度森不摧
異僧一見乃能識擊洞果有猿
聲哀靈隱之南天竺北
築亭結屋初誰謀直疑朱夏落
冰雪亦恐白晝藏風雷

檻泉清可數毛髮白石齒齒如瓊瑰參差透影微日下
浙瀝生籟長颺迴恍然若欲學蟬脫洗眼綠淨無纖埃
已將纓塵付流水更以屐齒留蒼苔南豐家世有人物
幅巾藜杖同裴徊劇談抵掌共相對惜無玉酒傾金罍
先仲微仲純仲三兄過普明寺賞雪分韻得飲

字

涉春徂冬禱雨雪皇天靳此云何甚兒童曉報六花飛
失喜鈎窗猶屢審荒渠斷溜水已合度鴈停號口應噤

望中玉樹散枝柯
二室峯巒張素錦
我家西隣有勝概
杖履清攜冒凝凜
平生不作兒女歡
此地適諧文字飲
濁醪冰蔬薦重味
燃鼎當爐肆烹飪
詩豪遽發要分吟
賴此放過新弛禁
歸來老匠已先成
定笑才慳弗勝任
惜哉初無田二頃
徒偕雀鼠賀登稔
堂堂大尹變理才
嘉瑞應祈當奠枕
書生醉飽何為者
鼻息如雷但酣寢
明朝更約提石餅
來試壑源最高品

短歌送范彥行

并引

昔司馬子微謂李白有仙風道骨可與神遊
八極之表白賦鵬以自廣實寓言也壯哉麗
矣而卒不及導引服食長生久視謂白不仙
可乎外弟范彥行風骨之異映世照人立乎
其旁覺我形穢仙事亡疑矣予流年駸駸忽
過知命蒼髯華髮把鏡自弔奔走塵土為兒
女憐殆不免于翦翦之流弟方為江外之行
予亦有吳中之役飄然南北眷不忍別賦短

歌以激之九萬里則風斯在下可不勉哉它
日相遇顏如渥丹氣塞天地使予駭歎之不
暇者必知得於此也且為停杯一笑之資云
海上芳敷有瑤草採而食之顏不老海中翕輶有驪珠
採而得之形不枯赤烏玄兔未同宿姹女嬰兒自相逐
深存踵息通三關升降出入無時間九轉七返成大還
功高行滿起人寰凌虛一舉三神山

次韻德基效歐陽體作雪詩禁體物之字兼送

表臣才臣友直勉諸郎力學之樂仍率同賦

朝來凍坐如縮龜不聞打窗那得知江南地暖亦有此
驚心遠自龍沙吹六一居士最能賦東坡先生追撫髭
腐儒得句亦起舞硯寒沃筆浮輕澌征塵暗天鐵馬健
衣冠南奔身世危兄弟相望音信絕梳頭紛紛滿面絲
短褐袖手如懷冰車馬不來奚所為前年毗陵雪盈尺
蟹螯猶記左手持歸來浩歌仰看屋夜深凜凜粟滿肌
室中老婦幾興嘆膝下奈此號寒兒今年造物頗垂顧

稅駕仁里懼此時殺雞為黍朝夕事苦節諸郎方下幃
起看松竹有持操坐對溪山無俗姿劉子唱高和彌寡
要當獨醒歎其醜已呼稚子來候門更戒黃童無掃埽
十千不向樓頭貫一蓑正憶江上披五陵之客誇輕肥
呼鷹逐獸廣莫馳五侯之第事豪侈珊瑚照耀金屈卮
豈如高舉縱清賞鈎簾一目萬景隨亦有未至居客右
其言不讓故哂之

枯腸服氣如壽龜窮冬却掃百不知開門忽見雪滿地

縱橫浩蕩春正飛入隙時欣點萬卷仰簷不見霑吟髭
松林冥冥起薄霧澗水活活生微澌清可洗心明洗目
卑且不污高不危殘粧如見壽陽面不食可憐姑射肌
書生長年營口腹頗似蜘蛛空吐絲身將老矣厄離亂
我生之初尚無為百篇落落或能賦一杯炯炯須重持
崆峒漫倚防身劍枉負平生作男兒回首農桑三萬里
無復貞觀開元時恭惟天子尚勤儉早集書囊為殿帷
一朝隨仗過沙漠落日風塵龍鳳姿此時燕山士如虎

寒多况乃秣酒醜肉食豈堪茹毛苦應念靴鳴集赤墀
塵沙錯落赭黃暗貂狐獨向寒風披關山寂寞草樹死
指點射獵方奔馳心益不忘嘗膽事望雲遙祝萬壽卮
向來竊取名器者扈聖曾無一夫隨忠臣義士憤切骨
皇天后土儻鑒之

浴罷

泉湯淪膚垢如失振衣坐覺神充實挹其寒冽事清盥
三嚙逾甘過飴蜜華清之池故有名玉蓮出水香霧生

可憐妃子汗猶濕已聞伐鼓漁陽聲我思行吟澤畔者
夢想滄浪歸濯纓

次韻劉端禮兼簡王民瞻郭進道

從來膏粱鄙世胄豈知牛後與鷄口况乃末俗交道衰
時態紛紛翻覆手劉君門多長者轍俗子驅車未容蹂
斯文博約有王郎正如白二得元九子猷無事只種竹
淵明有巾惟漉酒萬鍾五斗唾不顧冷笑纍纍印如斗
我今已無田園歸身外寧論婚嫁有卞和三獻已兩刖

被褐會當逢一剖今君家世自汾陽漢相人物何堂堂
坐使斯民歌樂康豈弟之化如龔黃趣君移具過吟窗
羽蟲得時已飛揚

謝徐獻可送款識刻

九江使君何殷勤千里遺我款識文夏匝商鐘迄周鼎
良工模刻錙銖分先秦述作知淵源相斯不紹嗟無傳
歷載數千如昨日人與寶器名俱鐫使君雅尚心絕俗
攷古稽疑如不足搜羅遐邇極聞見附益之功思更續

曾奉宣和乙夜觀萬文光芒斗寒兵戈散落人間世
神護往往投衣冠時去事非空歎息玉軸牙籤蛛網織
載行何啻數橐駝變故紛紛豈人力煙塵翳沒咸陽道
尺璧寸珠沉野草秋風吹夢入長安白髮蒼顏日枯槁

夢江彥文

春寒蘋末風尤勁過雨山林都眼淨西江天來瀉明鏡
劈箭孤帆飛小艇中有文人若冰壺冰為眸子玉作膚
黃河逆流滄海枯彷彿羨門丹丘徒僊風道骨何敷腴

煙霞之姿遠見揖弭棹芳洲招我急野人竭蹶捩衣入
酌之瑤丹飫瓊汁薦以金桃露猶濕御冠衣袂方泠然
岸巾笑拍洪崖肩交梨火棗開心田木鑽石盤今已穿
青鞋布襪白行纏遊戲人間五百年

送李巨源

我世君家居里同異時德隣飽過從論文高摘屈宋艷
結交遠躡管鮑蹤嗟我不識文人行喜君雅有前輩風
靖康三月虎狼去長安城中一再逢笑談未了已吹斷

五年千里一轉蓬只知兵戈事奔竄豈料樽酒陪從容
清溪照人山入座鶯聲已老春事空人生一世太草草
客舍百事尤忽忽和文已遠典型在芝蘭玉樹庭砌中
况君屢持使者節至今能聲滿河東丞相方須幕中畫
國士之顧必所蒙開元貞觀望公等天子不在咸陽宮

贈葉生

帶如當風衣出水曹吳丹青古莫比一時更有劉與揚
妙手斲泥端及此葉生心匠何瓌奇異代同聲人所推

頗甘蔬飯絕肉想神物自應來護持
花鬘珠冠寶月相
補陀寶山移海上
淨餅揚柳翠鸚鵡
突兀驚人煥尋丈
十六尊者初不同
儼然肖貌清而雄
或伏猛虎制毒龍
或飛錫杖凌虛空
偉哉功刮造化窟
凜發天風肅毛骨
來觀堵立萬口傳
坐看聲名從此出

賀雨

太歲治水十二龍
春夏用事秋罔功
半年不雨人作惡
禾苗枯槁井泉涸
使君勤政首勸農
憂國如家願年豐

齋居意禱天已通四山升雲野返風雨脚如麻未斷絕
簷溜連宵聲不歇競報兼并發倉廩千里歡呼舞童耆
上帝猶怒勅雨師羣龍鞭後不敢遲帝力於民民豈知
始我公田單及私搗苗復起井泉湧更聞擊鼓歌魚夢
廟堂行拜富民侯歸作商家霖雨用

次韻劉彥冲醉歌

家山回首三千里世亂身危今老矣由來客子鬪身強
敢弗加餐慎行李閩中此地稱多賢招我作隣客且邇

二子人物夙所慕，傾蓋忘形到汝爾。劉郎能事出世家，
勝韻那知集於此。人生多計纔狙公，朝暮不離三四中。
我今一食日還併，士也乃有如此窮。愛酒猶能致山簡，
清談兼喜對王戎。異時掉臂五侯門，解紛堪作滑稽雄。
如今流落百無用，夜起捋鬚問蒼穹。白髮蕭蕭不勝理，
客舍燈花虛作喜。憐君咳嗽是珠璣，照眼陸離光棊几。
惜不當年奪繡袍，枉著詞鋒誇孟勞。遣我黎明擁吟鼻，
寒蟬抱葉空哀號。

喜賊退

父母之邦豈復讎人情至此乃可憂刺史縣令方坐視
久矣肉食無遠謀崇墉可當天設險煙火驚奔無一點
可憐縮手俱就斃不見一夫來襲掩清晨諸家好音至
說賊回戈馬回轡玉帛子女既充奴捆載而歸乃真退
妻孥向來便伸眉將軍凱旋亦班師身長八尺劍三尺
緩帶輕裘有設施

翁士特借韻見及復答之

許國以身身反辱十日呼天鬢凋綠蠻貊直倚忠信行
我心不疑顧何卜生喜柴愚惡鮀佞封侯豈謂能鈎曲
可憐論交道大喪雲雨紛紛手翻覆望郎胸中橫萬卷
日破千篇酌一斛雅好上取唐虞器多聞遠識肅慎鏃
桃李不言自成蹊家法整如官府肅四海人高懸犢鼻
定知不作窮途哭郎君天池渥注種墮地驚人千里足
夜光聯璧乃暗投刮膜金篦快三復草玄正憶揚雄宅
我今皇皇未有屋餘波豈止九里潤周也意在監河粟

次韵端禮謝郭宰載酒相訪之什

賢哉令尹出名曹
百里歌謠不容口
豈弟父母今信之
視民恐傷如足手
訟庭端可置雀羅
若網在綱無雜糝
萬頃之陂黃叔度
雲夢何止吞八九
潘岳無事只種花
陶潛有巾惟漉酒
三公九卿唾不取
金印從渠大如斗
劉君語默端可人
固知十室忠信有五
經腹笥貫今古
決疑索隱如瓜剖
小圃風煙似洛陽
翠微不減綠野堂
會聞激烈歌時康
不負抵掌工堆黃
何時贈扇乃有語

向來仁風已奉揚

送庾姪親迎延平李先生家

庾郎吾家千里駒朝暮勤苦讀父書少年綽有老成態
月旦考訂評鄉閭明當別我擇賢妃去聲結束琴劍誰挽

裾春空吹晴惠風暢煙草弄色和氣舒野橋融洩柳絮
合石岸慘愴鳴鷓鴣乘龍有期弗獲餞數椽政葺淵明
廬旅愁冥思莫排遣離恨掛臆難掃除況當春晚氣暄
淑著體欲醉甘醴如修程所囑蓋養攝禮畢早辦雙飛

輿婦翁傳道世大儒習俗再使淳古初稔知賢舅繼家
學子如從之師有餘歸來阿叔待審訂義路禮門從廣
居

雙溪堂晚集

北風呼雲生夕陰小松稚竹俱蕭森雙溪主人不孤斟
好文尚類肯見尋坐中少監樂登臨清談疊疊知古今
有句不吐藏之深而令下士寒蛩吟

遊石橋

御風縹緲雲霞衣
驂龍翳鳳相追隨
三秀為糧桂為醕
玉笛送酒雙童吹
樵歌已換人間世
未了巖前一局棋
桃源歸路咫尺迷
醉眼疑在扶桑西
仙人授我長生訣
俄而夢覺鳴天鷄

張元覽追和東坡詠梅要予同賦

江空月掛踈梅村
生香漙袂何郎魂
亭亭自是塵表物
玉質敢有煙埃昏
西州風土似南國
高樹繚臺丞相園
居然志士節
獨苦烟若德人
願更溫至今
往往入幽夢

夢去折花迎朝暎
冠來一炬半月紅
傷心無處求朱門
君知行樂不可緩
中聖友賢餘勿言
侍郎堂西臘前破
喚取我輩斟窪樽

文度以大笏見遺
竒偉特甚非鄙人
所稱擬柏梁體
廿句以謝然他日
出處斷不負此笏
老狂不衰聊供一
笑云

南越巨象何壯哉
齒牙脫落歲幾枚
削木混真易以埋
玩視常恐生慙猜
良工到手能剪裁
成此大笏莫與偕

遠隨舶賈凌濤雷論賈奚啻百瓊瑰異貺忽自王孫來
珍藏十襲敢遽開瑩如截玉無纖埃照人水彩滿袖懷
惟君許我王佐才我亦自負剛不推他年致主登中台
垂紳我弁直斗魁正色凜凜天可回帝傍奸佞須擊排
恢復洪業平秦階寫之丹青上雲臺

懷陸仲仁

陸郎好古心不俗雅似王郎愛脩竹綠陰清晝坐焚香
想見人琴兩如玉尺書招我我未暇興發從君醉醺醪

秋風滿院木樨繁
明月飛來花底宿

觀漁

老漁取魚倍知津
設網提網疑有神
船頭兀坐如鴟蹲
忽然一舉千百鱗
涎沫盈管趨早市
掌握銅腥俱是利
陂湖漠漠水連天
盡欲留為子孫
計書生白首困嚙
世亂身危舟一葉
君不見孟嘗門下
客三千此日馮驩
正彈鋏

闔山亭

亭臯樹林五月寒坐揖秀爽披孱顏使君清雅頗好事
妙墨風流名闖山雲歸雨罷作佳色山在杳靄空濛間
煙中合選展屏障鳥外紆餘堆髻鬟踈簾捲盡一搔首
決皆盪胃如可攀江頭好山不知數供給騷人猶等閒

簡柴端叟

筆端落落曳十斗老氣飄飄橫九州河伯未睹北海若
魯人未識東家丘豪戶但餘酒肉臭要塗舐益衣冠羞
且評公議百年後此士斯文班馬儔

乾
坤
廣
陸